



*Senin, 21 Pebruari 2022*

**Ogen: Ulangen 31:1-6**



**TETAPKENLAH UKURNDU**



Ibas kegeluhen manusia pasti pernah nge jumpa si la bagi ukur nta pe gagal. Tapi siperlu siinget ras gelem maka kegagalen sijumpai labo jadi akhir kerina kecibal geluh. Lit denga nge turah si mehuli, arapen kerna wari sipepagi. *'Di balik kegagalanmu ingatlah harapan yang kau panjatkan di langkah pertamamu'*. Bageme sada kata bijak si jadi persinget man banta, maka tep-tep kita menaken sada dahin, mbelin kal toto ras arapen si tungtungken kita, si peturah kita tangtangna nari.

Bageme sada dampar penggejapen Musa, ibabana kalak Israel ndarat i Mesir nari. Ia me jadi pemimpinna tapi ietehna kal nge maka labo banci itaruhkenna bangsa e seh kutujun. Bagi nina, labo banci kukepari lau Jordan. Amin la seh ia itaruhken Tuhan bagi siipadankenna man nini-ninina nai, tapi mbelin pengarapenna maka bangsa e seh kutujun, enda me arapen bangsa enda tantangna nari. Emaka iturikenna kai siarus ilakoken bangsa e dengen ituduhkenna ise sinerusken mabai bangsa e ku taneh e. Josua nerusken kepemimpinan Musa amin Tuhan nge situhuna sijadi pemimpinna sabab Tuhan nge si erperang ras imbang-imbangna. Bagenda me ia mpetetap ukur bangsa e, gelah tek nandangi padan Dibata. Ola mbiar ngalaken kai pe siijumpaina bas perdalanenna denggo. Sipasti Tuhan sekawalna, singlarak-ngaraksa. Labo banci juru bangsa e sabab labo pernah itadingken DIBata ia. Tetap nge ipetetapNa ukur bangsa e.

Bageme kita ibas ndalani kegeluhenta. Tetap itemani Tuhan kita. IpetetapNa ukurta alu kuasa dengen keleng ateNa, amin erbage situasi siman alankenta, siman jumpan, ola kal mbiar, tetaplah ukur sabab lit Dibatata si erkuasa ibas kerna paksa e. Ia erdahin guna kiniulin geluh kalak siipilihna guna naksiken kuasa Tuhan.

☞ *Tetapkenlah ukurta ngikutken Yesus e*